

和清真詞一卷

方千里

清和真詞

目錄

瑞龍吟一調	瑣寒窗一調	風流子一調
渡江雲一調	應天長一調	荔枝香三調
還京樂一調	掃花遊一調	解連環一調
玲瓏四犯一調	丹鳳吟一調	滿江紅一調
瑞鶴仙一調	西平樂一調	浪淘沙一調
憶舊遊一調	蕩山溪一調	少年遊二調
秋蕊香一調	漁家傲二調	南鄉子一調
望江南一調	浣溪沙三調	迎春樂二調
點絳脣一調	一落索二調	垂絲釣一調
滿庭芳一調	隔浦蓮一調	法曲獻仙音一調
過秦樓一調	側犯一調	寒翁吟一調
蘇幕遮一調	浣溪沙四調	點絳脣一調
訴衷情一調	風流子一調	華胥引一調
宴清都一調	四園竹一調	齊天樂一調
木蘭花一調	霜葉飛一調	蕙蘭芳一調

宋六十名家詞

二

塞垣春一調	丁香結一調	氏州第一一調
解蹀躞一調	少年遊一調	慶春宮一調
醉桃源二調	點絳脣一調	夜遊宮二調
訴衷情一調	傷情怨一調	紅林擒近二調
滿路花一調	解語花一調	六么令一調
倒犯一調	大酺一調	玉燭新一調
花犯一調	醜奴兒一調	水龍吟一調
六醜一調	虞美人二調	蘭陵王一調
蝶戀花四調	西河一調	三部樂一調
菩薩蠻一調	品令一調	玉樓春一調
滿路花一調		

和清真詞

宋 方千里

瑞龍吟

樓前路。愁對萬點風花。數行煙樹。依依斜日紅收。暮山翠接。平蕪盡處。小留佇。還是畫闌凭
暖。半局朱戶。簾櫳儘日無人。消凝悵望。時時自語。堪恨行雲難繫。賦情楊柳。徘徊猶舞。追想
向來歡娛懷抱。非故題紅寄綠。魂斷江南句。何時見。輕衫霧唾。芳茵蓮步。燕子西飛去。爲人試
道。相思悶緒。空有腸千縷。清淚滿。斑斑多于春雨。忍看鬢髮。密堆飛絮。

瑣窗寒

燕子池塘。黃鸝院落。海棠庭戶。東風暗許。借與輕風柔雨。奈春光。困人正濃。畫闌小立。慵無語。
念冶遊時節。融怡天氣。異鄉愁旅。朝暮凝情處。嘆聚散悲歡。歲常十五。連飛並羽。未抵鴛朋
鳳侶。算章臺楊柳。尙存。楚娥鬢影依舊否。再相逢。拚解雕鞍。燕樂同杯俎。

風流子

春色徧橫塘。年華巧。過雨溼殘陽。正一帶翠搖。嫩莎平野。萬枝紅滴。繁杏低牆。惱人是。燕飛盤
輾舞。鶯語咽。輕簫還憶舊遊。禁煙寒食。共追清賞。曲水流觴。迴思歡娛處。人空老。花影尙占
西廂。堪惜翠眉環坐。雲鬢分行。看戀柳煙光。遮絲藏絮。妬花風雨。飄粉吹香。都爲酒驅歌使。應

也無妨。

渡江雲

長亭今古道。水流暗響。渺渺雜風沙。倦遊驚歲晚。自歎相思。萬里夢還家。愁凝望結。但掩淚慵
整鉛華。更漏長。酒醒人語。睥睨有啼鴉。傷嗟。回腸千縷。淚眼雙垂。遏離情不下。還暗思。香翻
香燼。深閉窗紗。依稀看徧江南畫。記隱隱煙靄。兼葭。空健羨。鴛鴦共宿叢花。

應天長

嫩黃上柳。新綠漲池。東風豔冶天色。又見乍晴還雨。年華傍寒食。春依舊。身是客。對麗景。易傷
岑寂。悵凝望。一帶平蕪。翦就茵藉。前度少年場。醉記旗亭。聯句徧窗壁。調笑映牆紅粉。參差
水邊宅。蘆鞭嬾過故陌。恨未老。漸成塵跡。漫無語。立盡斜陽。懷抱誰識。

荔枝香

勝日登臨幽趣。乘興去。翠壁古木千章。林影生寒霧。空濛冷溼人衣。山路元無雨。深澗斗瀉。飛
泉溜甘乳。漁唱晚。看小棹歸前浦。笑指官橋。風颭酒旗斜舉。還脫宮袍。一醉芳杯倒鸚鵡。幸
有雕章蠟炬。

又

小園花梢雨歇。浪羞泣。碧瓦光霽。羅幕香浮。鶯啼燕語交加。是處池館春徧。風外認得。笙歌近

遠。醉魂半縈夜酒。吹未散。暗憶年時。正日赴西池宴。笑攜豔質。郢曲新聲妙如翦。有愁容易排遣。

還京樂

歲華慣。每到和風麗日。歡再理。爲妙歌新調。粲然一曲。千金輕費。記夜闌沈醉。更衣換酒珠璣。委恨畫燭搖影。易積銀盤紅淚。向笙歌底。問何人能道。平生聚合。歡娛離別。興味誰憐露浥。烟籠盡栽培豔桃穠李。漫縈牽空坐。隔千山。情遙萬水。縱有丹青筆。應難摹畫憔悴。

掃花遊

野亭話別。恨露草芊綿。曉風酸楚。怨絲恨縷。正楊花醉玉。滿城雪舞。耿耿無言。暗灑闌干淚雨。片帆去。縱百種。避愁。愁早知處。離思都幾許。但漸慣征塵。斗迷歸路。亂山似俎。更重江浪淼。易沈書素。瞪目銷魂。自覺孤吟調苦。小留佇。隔前村。數聲簫鼓。

解連環

素封誰託。空寒潮浪疊。亂山雲邈。對倦景無語。消魂但香斷露晞。絮飛風薄。杜宇聲中。動多少。客情離索。繞闌干。竚立暗記。那回賞徧花藥。依依歲華自若。更低煙暮草。殘照孤角。嘆息故里春光。有幽圃名園。算也閒卻。早早歸休。漸過了芳條華萼。趁良時。按歌喚舞。舊家院落。

玲瓏四犯

傾國名姝。似暈雪勻酥。無限嬌豔。素質閒姿。天賦淡蛾豐臉。還是睡起慵妝。顧鬢影翠雲零亂。恨平生把鑒驚換。依約瑣窗逢見。繡幃凝想。鴛鴦薦。畫屏烘獸煙葱蒨。依紅傍粉。憐香玉。聊慰風流眼。空嘆倦客斷腸。奈聽徹殘更急點。仗夢魂一到。花月底。休飄散。

丹鳳吟

宛轉迴腸離緒。嬾倚危闌。愁登高閣。相思何處。人在繡幃羅幕。芳年豔齒。枉消虛過。會合絲輕。因緣蟬薄。暗想飛雲驟雨。霧隔烟遮。相去還是天角。悵望不時夢到。素書漫說波浪惡。縱有青青髮。漸吳霜妝點。容易凋鑠。歡期何晚。忽忽坐驚搖落。顧影無言。清淚溼。但絲絲盈握。染斑客袖。歸日須問著。

滿江紅

爲憶仙姿。相思恨纏綿未足。從別後沈郎消瘦。帶圍如束。消息三年沈過處。關山千里無飛肉。算誰知中有不平心。彈棋局。空想像。金釵卜。時畏翫。回紋曲。許何時重到。瑣窗華屋。長得一生花裏活。輭紅深處鴛鴦宿。也勝如騎馬著征衫。京塵撲。

瑞鶴仙

看青山繞郭。更暮草萋萋。疎煙漠漠。無風自花落。欲黃昏誰向。官樓吹角。剛腸頓弱。恨別來辜負厚約。想香閨念舊。還憶去年共舉杯酌。寂寞光陰虛度。未說離愁。淚痕先閣。珠簾翠幕。除

相見是奇藥。況中年已後。凭高臨遠。情懷終是易惡。早歸休。月地雲階。賸追笑樂。

西平樂

倦踏征塵。厭驅匹馬。凝望故國猶賒。孤館今宵。亂山何許。平林漠漠煙遮。悵過眼光陰似瞬。回首歡娛異昔。流年迅景。霜風敗葦。驚沙無奈輕離易別。千里意。刷淚獨長嗟。綺窗人遠。青門信杳。叙影何時重見。雲斜空怨憶。吹簫韻曲。旋錦回文。想像宮商蠹損。機杼生塵。誰爲新裝暈素華。那信自憐。悠颺夢蝶。浮沒書鱗。縱有心情。盡爲相思。爭如傍早歸家。

浪淘沙

素秋霽。雲橫曠野。浪拍孤堞。柔櫓悲聲頓發。驪歌恨曲未闕。念一寸回腸千縷結。柳條在。忍使攀折。但悵惆。章臺路多少。相思綽愁絕。淒切。去程浩渺空闊。奈斷梗孤篷。西風外。蔌蔌殘吹咽。應暗爲行人。傷念離別。淚波易竭。凝怨懷羞覩當時明月。煙浪無窮。青山疊。魚封遠雁書漸歇。甚時合金釵分處缺。但飄蕩。海角天涯。再見日。應憐兩鬢玲瓏雪。

憶舊遊

念花邊玉漏。帳裏鸞笙。曾款良宵。鏤鴨吹香霧。更輕風動竹。韻響瀟瀟。畫簷皓月初掛。簾幕縠紋搖。記罷曲更衣。挑燈細語。酒暈全消。迢迢舊時路。縱下馬銅駝。誰聽揚鑣。奈可憐庭院。又徘徊虛過。清夢難招。斷魂暗想幽會。回首渺星橋。試彷彿仙源。重尋當日千樹桃。

暮山溪

園林晴晝。花上黃蜂尾。鶯語怯遊人。又還傍綠楊深避。曲池斜徑。草色碧於藍。闌倦倚。簾半起。魂斷斜陽裏。江南春盡。渺渺平橋水。身在一天涯。問此恨何時是已。飛帆輕槳。催送莫愁來。歌舞地。尊酒底。不羨東隣美。

少年遊

丹青閑展小屏山。香燼一絲寒。織錦回紋。生綃紅淚。不語自羞看。相思念遠關河隔。終日望征鞍。不識單栖。忍教良夜。魂夢覓長安。

又

東風無力颺輕絲。芳草雨餘姿。淺綠還池。輕黃歸柳。老去願春遲。闌干凭暖慵回首。閒把小花枝。怯酒情懷。惱人天氣。消瘦有誰知。

秋蕊香

一枕鶯鶯錦暖。初起嬾勻妝面。綠雲嬈娜映嬌眼。酒入桃腮暈淺。翠簾半捲香縈線。礙飛燕。畫屏淺立意閒遠。春鎖深沈小院。

漁家傲

燭彩花光明似晝。羅幃夜出傾城秀。紅錦紋茵雙鳳闕。看舞後。腰肢宛勝章臺柳。眼尾春嬌

波態溜金尊。笑捧纖纖袖。一陣粉香吹散酒。更漏久。消魂獨自歸時候。

又

冷葉啼螢聲側側。銀牀曉起清霜積。魂斷江南煙水國。書難得。相思此意無人識。綠鬢金釵。年少客。愁來嬾傍菱花仄。霧閣雲窗閒枕席。情何適。杯盈珠淚還偷滴。

南鄉子

西北有高樓。淡靄殘烟漸漸收。幾陣涼風生客袖。颼颼。心逐年華袞袞流。花卉滿前頭。老嬾。心情萬事休。獨倚闌干無一語。回眸。鼓角聲中喚起愁。

望江南

春色暮。短艇艤長隄。飛絮空隨花上下。啼鶯占斷水東西。來往燕爭泥。桑柘綠。歸去覓前蹊。夜甕酒香從蟻鬪。曉窗眠足任雞啼。猶勝旅情悽。

浣溪沙

楊柳依依窄地垂。麴塵波影漸平池。霏微細雨出魚兒。先自別來容易瘦。那堪春去不勝悲。腰肢寬盡縷金衣。

又

無數流鶯遠近飛。垂楊裊裊弄晴暉。斷腸聲裏送春歸。鬢影空思香霧濕。機塵還想步波微。

去年花下酒闌時

又

清淚斑斑著意垂。消魂迢遞一天涯。誰能萬里布長梯。先自樓臺飛粉絮。可堪簾幕捲金泥。相思心上乳鶯啼。

迎春樂

參差鳳鐸鳴高屋。漸驚覺清眠熟。看夕陽倒影花陰速。雙燕子歸來宿。幾曲危腸愁易束。問雪鬢何時重綠。料想此情同。應暗損香肌玉。

又

紅深綠暗春無跡。芳心蕩冶遊客。記搖鞭跋馬銅駝陌。凝睇認珠簾側。絮滿愁城風捲白。遞多少相思消息。何處約歡期。芳草外。高樓北。

點絳脣

池館春深。海棠枝上斑斑雨。酒旗斜舉。風滾楊花絮。遊子征衫。凭暖闌干處。空凝竚。杜鵑啼苦。還報南樓鼓。

一落索

月影娟娟明秀。簾波吹皺。徘徊空度可憐宵。漫問道。因誰瘦。不見芳音長久。鱗鴻空有。渭城

西路恨依然。尙夢想青青柳。

又

心抵江蓮長苦。淩波人去。厭厭消瘦不勝衣。恨清淚多於雨。舊曲慵歌瓊樹。誰傳香素。碧溪流水過樓前。問紅葉來何處。

垂絲釣

錦鱗繡羽。難傳愁態。顰嫵岸草際。天雲影垂絮。人何許。漫並闌倚柱。煙光暮。悵榆錢滿路。送春殢酒。歡期幽會希遇。彩簫鳳侶。回首分攜處。雙臉吹愁雨。無限語。再見時記否。

滿庭芳

山色澄秋。水光融日。浮萍飄碎還圓。數行征雁。分破白鷗煙。高下同塘暗谷。寫幽思終日濺濺。閒凝望。殘霞暝靄。何處一漁船。江南思舊隱。筠軒野徑。茆舍疎椽。慣攜壺花下。欹帽風前。想像淵明舊節。琴中趣何必疎絃。歸歟計。不將五斗。輸與北窗眠。

隔浦蓮

垂楊煙溼嫩葆。別嶼環清窈。紺影浮新漲。夷猶終日魚鳥。花妥庭下草。鳴蟬鬧。暗綠藏臺沼。野軒小。欹眠斷夢。閒書風葉顛倒。詩懷酒思。悔費十年昏曉。投老紅塵倦再到。愁覺悠然心寄天表。

法曲獻仙音

庭葉飄寒。砌蛩催織。夜色迢迢難度。細剔燈花。再添香獸。淒涼洞房朱戶。見鳳枕羞孤另。相思
洒紅雨。有誰語。這年來。爲郎憔悴。音問隔。回首後期尙阻。寂寞兩愁山鎖。閒情無限。翠嫵嫩
雪消肌。試羅衣。寬盡腰素。問何時夢裏。趁得好風飛去。

過秦樓

柳灑鵝黃。草揉螺黛。院落雨痕纔斷。蜂鬢霧溼。燕嘴泥融。陌上細風頻扇。多少豔景關心。長苦
春光疾如飛箭。對東風忍負。西園清賞。翠深香遠。空暗憶。醉走銅駝。閒敲金鐙。倦跡素衣塵
染。因花瘦覺。爲酒情鍾。綠鬢幾番催變。何況逢迎。向人眉黛供愁。嬌波回倩。料相思此際。濃似
飛紅萬點。（或作濃于空裏亂紅千點）

側犯

四山翠合。一溪碧繞。秋容靚波定。見鷺立魚跳。動平鏡。脩竹散步屨。古木通幽徑。風靜。煙霧直。
池塘倒晴影。流年舊事。老矣塵心瑩。還暗省。點吳箱憔悴。愧潘令。夢憶江南。小園路迴。愁聽
葉落。轆轤金井。

塞翁吟

暮色催更鼓。庭戶月影隴臆。記舊跡。玉樓東。看枕上芙蓉。雲屏幾軸。江南畫。香篆燼暖。煙空睡。

起處繡衾重。尙殘酒潮紅。忡忡從分散。歌稀宴小。懷麗質。渾如夢中。苦寂寞。離情萬緒。似秋後怯雨芭蕉。不展愁封。何時細語。此夕相思。曾對西風。

蘇幕遮

扇留風。冰卻暑。夏木陰陰。相對黃鸝語。薄晚輕陰還閣雨。遠岸煙深。彷彿菱歌舉。燕歸來。花落去。幾度逢迎。幾度傷羈旅。油壁西陵人識否。好約追涼。小艤兼葭浦。

浣溪沙

菱藕花開來路香。滿船絲竹載西涼。波搖髮彩粉生光。翡翠雙飛尋密浦。鴛鴦濃睡倚回塘。閒情須與酒商量。

又

密約深期卒未成。藏鉤春酒坐頻傾。向人嬌豔夜亭亭。相顧無言情易覺。歸來單枕夢猶驚。眼梢怨淚幾時晴。

又

面面虛堂水照空。天然一朵玉芙蓉。千嬌百媚語惺忪。未散嬌雲輕鞦韆。欲融輕雪乍凝胸。石榴裙衩爲誰紅。

又

刻樣衣裳巧刻繒。綵枝環繞萬年藤。生香吹透縠蠶冰。嫩水帶山嬌不斷。濕雲堆嶺膩無聲。香肩婀娜許誰凭。

點絳脣

閒蕩蘭舟。翠娥仙袂風中舉。鴛鴦深浦。綠暗曾來路。留戀荷香。薄晚慵歸去。還相顧。練波澄素。月上潮生處。

訴衷情

遠山重疊亂山盤。江上晚風酸。秋容更兼殘日。楓葉照人丹。書未到。夢猶閒。鬢先斑。凭高無語。征雁知愁。聲斷雲間。

風流子

河梁攜手別。臨歧語共約。踏青歸。自雙燕再來。斷無音信。海棠開了。還又參差。料此際笑隨花便面。醉聘錦鄣泥。不憶故園。粉愁香怨。忍教華屋綠慘紅悲。舊家歌舞地。生疎久。塵暗鳳縷羅衣。何限可憐心事。難訴歡期。但兩點愁蛾。纔開重斂。幾行清淚。欲制還垂。爭表爲郎憔悴。相見方知。

華胥引

長亭無數。羈客將歸。故園換葉。乳鴨隨波。輕蘋滿渚。時共唼。接眼春色何窮。更櫓聲伊軋。思憶

前歡未言心已愁。怯。欺鬢吳霜恨惺惺。又還盈鑷。錦紋魚素。那堪重翻再閱。粉指香痕依舊。在繡裳鴛篋。多少相思。皺成眉上千疊。

宴清都

暮色聞津鼓。煙波碧。數行征雁時度。輕榔聚網。長歌和楫。水村漁戶。行人又落天涯。但悵望高陽伴侶。記舊日酒卸宮袍。馬酬少妾詞賦。如今鬢影蕭然。相逢似雪。徒話愁苦。芳塵暗陌。殘花徧野。歲華空去。垂楊翠拂門徑。尙夢想當時住處。縱早歸綠漸成陰。青娥在否。

四園竹

花驄縱策。制淚掩斜屏。玉爐細裊。鴛被半閒。蕭瑟羅幃。銀漏聲。那更雜疎疎雨裏。此時懷抱誰知。恨淒其。西窗自翦寒花。沈吟暗數歸期。最愛深情密意。無限當年往復。詩辭千萬紙。甚近日人來字漸稀。

齊天樂

碧紗窗外黃鸝語。聲聲似愁春晚。岸柳飄綿。庭花墮雪。惟有平蕪如翦。重門向掩。看風動疏簾。浪鋪湘簾。暗想前歡。舊遊心事寄詩卷。鱗鴻音信未覩。夢魂尋訪後。關山又隔無限。客館愁思。天涯倦跡。幾許良宵展轉。閒情意遠。記密閣深閨。繡衾羅薦。睡起無人。料應眉黛斂。

木蘭花

溶溶水映娟娟秀。淺約宮妝籠翠袖。舞餘楊柳乍驚風。睡起海棠猶帶酒。懽懽蕭郎緣底瘦。那日花前相見後。西窗疑是故人來。費得羅牋詩幾首。

霜葉飛

塞雲垂地隄煙重。燕鴻初度江表。露荷風柳向人疎。臺榭還清悄。恨脈脈離情怨曉。相思魂夢眼屏小。奈倦客征衣。自徧拂塵埃。玉鏡羞照。無限靜陌幽坊。追歡尋賞。未落人後先到。少年心事轉頭空。況老來懷抱。儘綠葉紅英過了。離聲慵整當時調。問麗質從憔悴。消減腰圍似郎多少。

蕙蘭芳

庭院雨晴。倚斜照。睡餘雙鶯。正學染脩蛾。官柳細勻黛綠。繡簾半捲。透笑語瑣窗華屋。帶脆聲咽韻。遠近時聞絲竹。乍著單衣。纔拈圓扇。氣候暄燠。趁驕馬香車。同按繡坊畫曲。人生如寄。浪勤耳目。歸醉鄉猶勝旅情愁獨。

塞垣春

四遠天垂野。向晚景。雕鞍卸吳藍。滴草塞綿藏柳。風物堪畫。對雨收霧霽初晴也。正陌上煙光灑。聽黃鸝啼紅樹。短長音如寫。懷抱幾多愁。年時趁歡會幽雅。盡日足相思。奈春晝難夜。念征塵滿堆襟袖。那堪更獨遊花陰下一別。鬢毛減鏡中霜滿把。

丁香結

煙濕高花雨。藏低葉。爲誰翠消紅隕。歎水流波迅。撫豔景。尙有輕陰餘潤。乳鶯啼處。路思歸意。淚眼暗忍。青青榆莢。滿地縱貫。閒愁難盡。勾引正記。著年時。乍怯春寒陣陣。小閣幽窗。殘妝。脂粉。黛眉曾暈。迢遞魂夢萬里。恨斷柔腸寸。知何時。重見。空爲相思瘦損。

氏州第一

朝日融怡。天氣豔冶。桃英杏萼猶小。燕壘初營。蜂衙乍散。池面煙光縹緲。芳草如薰。更潏潏波。光相照。錦繡縈回。丹青映發。未容春老。倦客自嗟清興少。念歸計。夢魂飛繞。浪闊魚沈。雲高雁阻。瞪目添愁抱。憶香閨。臨麗景。無人伴。輕舉淺笑。想像消魂。怨東風。孤衾獨曉。

解蹀躞

院宇無人晴晝。靜看簾波舞。自憐春晚。漂流向羈旅。那況淚溼征衣。恨添客鬢。終日子規聲苦。動離緒。漫徘徊。愁步何時再相遇。舊歡如昨。匆匆楚台雨。別後南北天涯。夢魂猶記。關山屢隨書去。

少年遊

人如穠李。香濛翠縷。芳酒嫩於橙。寶燭烘香。珠簾閒夜。銀宇理鸞笙。歸時醉面春風醒。花霧隔疎更。低輾彫輪。輕攏驕馬。相伴月中行。

慶春宮

宿靄籠晴。層雲遮日。送春望斷愁城。繡落堆花。簾櫳飛絮。更堪遠近鶯聲。歲華流轉。似行蟻盤旋萬里。人生如寄。利鎖名韁。何用勞縈。駸駸皓髮相迎。斜照難留。朝霧多零。宜趁良辰。何妨高會。爲酬月皎風清。舞臺歌榭。遇得旅懽。期易成。莫辭杯酒。天賦吾曹。特地鍾情。

醉桃源

良宵相對一燈青。相思寫研綾。去時情淚滴紅冰。西風吹涕零。愁宛轉。意飛騰。晴窗穿紙蠅。夢知關塞不堪行。憶君猶問程。

又

鴛鴦濃睡碧溪沙。荷花深處家。快風收電掣金蛇。涼波流素華。吳國豔。楚宮娃。紅潮連翠霞。坐來忽忽燭光斜。城頭聞亂鴉。

點絳脣

綠葉陰陰。滿城風雨催梅潤。畫樓人近。朝霧來芳信。從解雕鞍。休數花吹陣。無多悶。燕催鶯趁。付與春歸恨。

夜遊宮

一帶垂楊蘸水。映芳草萋萋千里。跋馬回隄少年子。擁青蛾。向紅樓南酒市。拚飲鶯花底。恣

懽笑粉融香墜。不趁臨分醉中起。但依稀。寫柔情。留蜀紙。

又

城上昏烟四斂。畫樓外。陡聽更點。千里相思夢中見。恨年華。逐東流。隨急箭。簾影參差轉。夜初過。水沈烟亂。脂枕餘衾。故人遠。憶閒窗。鞦韆雲鬢。低粉面。

訴衷情

一鉤新月淡於霜。楊柳漸分行。征塵厭厭堆襟袂。雞唱促晨裝。淮水闊。楚山長。暗悲傷。重陽天氣。杯酒黃花。還寄他鄉。

傷情怨

閒愁眉上翠小。儘春衫寬了。舞鑑孤鸞。嚴妝羞獨照。王孫音信尙渺。度寒食。禁煙須到。趁賞芳菲。今年春事早。

紅林擒近

花幕高燒燭。獸爐深炷香。寒色上樓閣。春威徧池塘。多情天孫罷織。故與玉女穿窗。素臉淺約宮妝。風韻勝笙簧。遊冶尋舊侶。尊酒老吾鄉。清歌度曲。何妨塵落雕梁。任瑤階平尺。珠簾人報。脂拚酩酊飛羽觴。

又

曉起山光慘。晚來花意寒。映月衣纖縞。因風珮琅玕。三弄江梅聽徹。幾點岸柳飄殘。宛然舞曲初翻。簾影捲波瀾。把酒同喚醉。促膝小留歡。清狂痛飲。能消多少杯盤。況人生如寄。相逢半老。歲華休作容易看。

滿路花

簾篩月影金。風捲楊花雪。天邊鴻雁少。音塵絕。春光欲暮。客心歸心折。江湖波浪闊。目斷家山料應易過佳節。柔情千點。杜宇枝頭血。危腸餘寸許。誰能接。眠思夢憶。不似今番切。欲對何人說。攬鏡沈吟。瘦來須有差別。

語解花

長空淡碧。素魄凝輝。星斗寒相射。鳳樓鴛瓦。天風動。冉冉珮環高下。歌清韻雅。對好景芳尊滿。把花霧濃燈火。瑩煌笑語。烘蘭麝。千斛明珠照夜。況人如圖畫。明豔容冶。繡巾香帕。歸來路。緩逐杏韉驕馬。笙歌散也。愁萬炬。絳蓮分謝。更漏殘。驚聽西樓。吹小梅初罷。

六幺令

照人明豔。肌雪消繁燠。嬌雲慢垂柔領。紺髮濃於沐。微暈紅潮一線。拂拂桃腮熟。羣芳難逐。天香國豔。試比春蘭共秋菊。當時相見恨晚。彼此縈心目。別後空憶仙姿。路隔吹簫玉。何處闌干十二。縹緲陽臺曲。佳期重卜。都將離恨。拚與尊前細留囑。

倒犯

盡日任梧桐自飛。翠階慵掃。閒雲散縞。秋容瑩暮天清窈。斜陽到地。樓閣參差簾櫳悄。嫩袖舞涼颺。拂拂生林表。蕩塵襟。寫名醪。攜手故園。勝事尋蹤。松篁幽徑。寫曲沼。瞰靜綠。蔭簷影。龜魚小。信倦跡歸來好。倩叮嚀。長安遊子道。鬢髮霜侵。莫待菱花照。醉鄉深處老。

大酺

正夕陽閒。秋光淡。鴛瓦參差華屋。高低簾幕迴。但風搖環珮。細聲頻觸。瘦怯單衣。涼生兩袖。零亂庭梧窗竹。相思誰能會。是歸程客夢。路諳心熟。況時節黃昏。閑門人靜。凭闌身獨。歡情何太速。歲華似飛馬。馳輕轂。漫自歎。河陽青鬢。冉冉如霜。把菱花。悵然凝目。老去疏狂減。思墮策小坊幽曲。趁游樂繁華國。回首無緒。清淚紛於紅菽。話愁更堪剪燭。

玉燭新（海棠）

海棠初雨後。露粉妝成。肉紅團就。太真帳裏。春眠醒。緩蹙樓前宮漏。潮生酒暈。獨自倚闌干時候。吹鬢影斜立。東風餘寒半侵羅袖。驪山宮殿無人想。笑問君王。豔容如否。萬花競鬪。難比竝。麗美巧勻豐瘦。閨房挺秀。一顧丹鉛低首。應對羯鼓聲中。清歌美奏。

花犯（荷花）

渚風低。芙蓉萬朵。清妍賦情味。霧綃紅綴。看曼立分行。閒淡佳麗。靚姿豔冶。相扶倚。高低紛慍。

喜正曉色嬾窺妝面。嬌眠欹翠被。秋色爲花且徘徊。朱顏迎綺露。還應憔悴。腰肢小。腮痕嫩。更堪飄墜。風流事舊宮暗鎖。誰復見。塵生香步裏。漫歎息。玉兒何許。繁華空逝水。

醜奴兒

淩波臺畔花如翦。幾點吳霜。煙淡雲黃。東閣何人見晚妝。江南春近書千里。誰寄清香。別墅橫塘。鼓角聲中又夕陽。

水龍吟（海棠）

錦城春色移根。麗姿迴壓江南地。瓊酥拂臉。彩雲滿袖。羣芳羞避。雙燕來時。暮寒庭院。雨藏煙閉。正□□未足。宮妝尙怯。還輕洒。燕脂淚。長是歡遊花底。怕東風陡成怨吹。高燒銀燭。梁州催按。歌聲漸起。綠態多慵。紅情不語。動搖人意。算吳宮獨步。昭陽第一。可依稀比。

六醜

看流鶯度柳。似急響金梭飛擲。護巢占泥。翩翩飛燕翼。昨夢前迹。暗數歡娛處。豔花幽草。縱冶遊南國。芳心蕩漾如波澤。繫馬青門。停車紫陌。年華轉頭堪惜。奈離襟別袂。容易疎隔。人間春寂。漫雲容暮碧。遠水沈雙鯉。無信息。天涯漸老。羈客嘆良宵漏斷。獨眠愁極。吳霜皎半侵華幘。誰復省。十載勻香暈粉。髻傾鬟側。相思意不離潮汐。相舊家接酒巡歌計。今難再得。

虞美人

花臺響徹歌聲暖。白日林中短。春心搖蕩客魂消。搓粉揉香。排比一團嬌。重來猶自尋芳徑。吹鬢東風影。步金蓮處綠苔封。不見彩雲雙袖舞驚鴻。

又

高樓遠閣花飛徧。急雨梢池面。脩脩楊柳不知門。多少亂鶯啼處暮煙昏。銀鈎小字題芳絮。宛轉回文語。可憐單枕夢行雲。腸斷江南千里未歸人。

蘭陵王

晚煙直。池沼波痕皺碧。年芳爲花態。柳情按粉柔。藍釀春色。繁華記上國。曾識傾城幼客。風流事聯句。送鉤。牋綠綃紅遞書尺。行雲去無跡。念暖響歌臺。香霧瑤席。當時誰信盟言食。知一歲離聚。幾多間阻。人生如夢寄埃驛。況分散南北。悲惻。萬愁積。奈鸞鳳歡疎。魚雁音寂。天涯何處相思極。但目斷芳草。恨隨塞笛。那堪庭院。更聽得夜雨滴。

蝶戀花

漏泄東君消息後。短葉長條。著意遮軒牖。嫩比鵝黃初熟酒。染勻巧費春風手。萬縷篩金新月透。入夜柔情。還勝朝來秀。綵筆彫章知幾首。可人標韻無新舊。

又

一搦腰肢初見後。恰似娉婷。十五藏朱牖。春色惱人濃抵酒。風前脈脈如招手。黛染修眉蛾

綠透。態婉儀閒。自是閨房秀。堪惜年華同轉首。女郎臺畔春依舊。

又

碎玉飛花寒食後。薄影行風終日穿疏牖。有客思歸還把酒。閒吹倦絮輕粘手。雪滿愁城寒欲透。飄盡殘英。翠幄成穠秀。張緒風流今白首。多年襟度難如舊。

又

翠浪藍光新雨後。整整斜斜。高下籠窗牖。萬斛深傾重碧酒。量愁知落何人手。櫛霧梳煙晴色透。照影回風。一段嫣然秀。白下門東空引首。藏鴉枝葉長懷舊。

西河

都會地。東南王氣須記。龍盤鳳舞到錢塘。瑞煙回起。畫圖彩筆寫西湖。波光溶漾無際。翠闌最宜半倚。柳陰駿馬誰繫。鱗差觀閣接飛輦。銜廬萬壘。倒空碧浸輭琉璃。雲收天淨如水。夕陽照晚聽近市。沸笙簫歡動閭里。比屋樂逢堯世。好相將載酒。尋歌玄對。酬答年華鶯花裏。

三部樂

簾捲窗明。聽杜宇乍啼。漏聲初絕。亂雲收盡。天際留殘月。奈相送行客將歸。恨去程漸促。霽色催發。斷魂別浦。自上孤舟如葉。悠悠音信易隔。縱怨懷恨語。到見時難說。堪嗟水流急。景霜飛華髮。想家山路窮望睫。空倚仗魂親夢切。不似嫩朵。猶能替離緒千結。

菩薩蠻

黃雞曉唱玲瓏曲。人生兩鬢無重綠。官柳繫行舟。相思獨倚樓。來時花未發。去後紛如雪。春色不堪看。蕭蕭風雨寒。

品令

露晞煙靜。寂寥轉梧桐寒影。天際歷歷征鴻近。被風吹散。聲斷無行陣。秋思客懷多少恨。慢厭厭誰問。暈殘蘭地香消印。夢魂長定。愁伴更籌盡。

玉樓春

華堂銀燭堆紅淚。解說離人多少意。恨從別後恨無窮。愁到濃時惟一味。江南渭北三千里。憔悴相思何日已。馬蹄清曉草黏天。庭院黃昏花滿地。

滿路花

鶯飛翠柳搖。魚躍浮萍破。班班紅杏子。交榴火。池臺晝永。繚繞花陰裏。山色遙供座。枕簟清涼。北窗時喚高臥。翻思少年走馬銅駝左。歸來敲鐙月。留關鎖。年華老矣。事逐浮雲過。今吾非故我。那日尊前。祇今間有誰呵。

和清真詞終

和清真詞跋

美成當徽廟時提舉大晟樂府。每製一調。名流輒依律賡唱。獨東楚方千里樂安楊澤民有和清真全詞各一卷。或合爲三英集行世。花庵詞客止選千里過秦樓風流子訴衷情三闋。而澤民不載。豈楊劣於方耶。湖南毛晉識。